

Nautnes vert hamn for små cruiseskip

I byrjinga av juni kjem cruiseskipet SeaDream I på vitjing til Nautnes. Det er første gongen eit cruiseskip finn vegen til Øygarden. Og fleire kan det verta.

NAUTNES: I byrjinga av juni kjem luksusskipet SeaDream I til Nautnes, som ein av dei siste hamnene skipet vitjar før det dreg attende med alle dei styrrike amerikanarane ombord.

Det er Ove Forstrønen som har arbeidd dette fram. No ser han på sjansane for å gjera Øygarden til ei fast hamn for mindre cruiseskip.

– Dette er stort. Dette er fantastisk. Om dei som kjem med SeaDream I er nøgde med det me tilbyr, så kjem det garantert til å koma fleire slike båtar hit, seier Forstrønen og tenker på kva ein ser av cruiseskip i Sognefjorden.

– Dette vert som om Kongeskipet skulle koma på vitjing til Øygarden, smiler Forstrønen.

Historieforteljing

Han har ingen planar om å la lukkusspassasjerane vansmekta når dei går på land på Nautnes. Forstrønen har samla historieforteljarar og -formidlarar for å gje amerikanarane gode historier om den norske Amerika-utfarten fra Nautnes.

– Dei skal fiska, og dei skal få reisa til Kystmuseet. Så skal me ha grillfest. Det er vanleg på slike cruise at ein har ein stor grillfest mot slutten av reisa. Denne festen skal dei ha her, seier Forstrønen.

Egil Sæle er hyra inn som his-



torieforteljar. Han skal blant anna snakka om Ola Hovden, som drog til Amerika frå Nautnes. Han var berømt i Statane, og heime her lever legatet etter Hovden enno.

– Dei skal få eit godt stykke utvandrarhistorie, seier Forstrønen stolt.

Han trur kommunen kjem til å koma godt ut av det, om dette besøket vert ein suksess.

KAI SVELLINGEN-FLATEKVÅL

kai@vestnytt.no

924 11 906



Amerikanske SeaDream I kjem til Nautnes i sommar. Det vert fort ein fest ut av det då.

Arvid Lauritzen (t.v.) sit på historia saman med Birger Oen. Kjell Dåvøy er hobbyhistorikaren i denne saka. Ove Forstrønen (i midten) er lukkeleg over cruise-anlopet i juni. Foto: Kai Svellingen-Flatekvål

Vil byggja støysvak ballbinge

EIDESJØEN: Den planlagte ballbingen til Eidesjøen grendalag vil hamna svært nær bustadhús. For å minska støyen, blir det nettingveggar istadenfor treplankar.

Helsedirektoratet tilrår at ballbingar blir plassert minst 100 meter frå bustadområde. Årsaka er støy frå stemmer og ballar som smell i veggane på ballbingen. Men då vert det vanskeleg å finna plass til grendalaget sin ballbinge. Denne vil bli plassert berre nokre få meter frå to nabohus. Difor vil grendalaget bruka ein ny type ballbinge, som har netting heller enn treveggar heile

vegen rundt. Slik vil støyen bli vesentleg redusert. Men Sund kommune krev at ein også set opp støyskjerm, og truleg vil det koma ein 20 meter lang og to meter høg støyskjerm der.

Planutvalet skal handsama sak måndag. I tilrådinga til vedtak vert det lagt opp til at ballbingen skal vera stengt mellom klokka 21.00 og 06.00 alle dagar. Det blir også stilt krav om at ein skal ha på plass ei lydteknisk rapport før Eidesjøen grendalag får byrja å byggja.

KYRRE STYVE

kyrre@vestnytt.no



Det er ein ballbinge liknande denne Eidesjøen grendalag vil setja opp. Nettingveggane gjev mindre støy enn dei tradisjonelle treveggane. (Foto: PST Sport)